

27.
23

DISSERTATIO INAUGURALIS MEDICO CHIRURGICA
DE

MORBO LAZARI

QUAM
CONSENSV

GRATIOSÆ FACULTATIS MEDICÆ
PRÆSIDE

DN. FRIDERICO HOFFMANNO
ACADEMIÆ ET FACULTATIS MEDICÆ
SENIORE

PRO DOCTORIS GRADU

PUBLICÆ ERUDITORVM DISQVISIONI
SVBMITTIT

D. Septembr. Anni MDCCXXXIII.

AUCTOR

SAMVEL GOTTFRIED FEIGE
KREIB. SILESIVS.

HÆLE MAGDEBVRGICÆ

TYPIS IOHANNIS CHRISTIANI HILLIGERI, ACAD. TYPOGR.

DISSERTATIO IN AGRICULTURA MEDICA

DE

MORBO LARI

GRADU

CONSENSU

GRATIA FACULTATIS MEDICAE

PRESIDE

N. FRIDERICO HOFEMANNO

ACADEMIAE ET FACULTATIS MEDICAE

SENIORE

PRO DOCTORIS GRADU

PUBLICA FRIDERICI DISSENTATIONE

IN AGRICULTURA MEDICA

ACTOR

SAMUEL GOTTFRIED FRIG

K. A. G. G. G.

1777

FRIDERICI DISSENTATIONE



DISSERTATIO INAUGVRALIS MEDICO-
CHIRVRGICA

DE

MORBO LAZARI

PRAEFATIO.



Inter medicinæ partes præ-
stantissima vetustissimis tempo-
ribus celebrata fuit Chirurgia,
& hodie celebrari *videtur*: &
dum primi Podalirius & Ma-
chaon, *teste Cornelio Celso* pag.2.

vulneribus tantummodo ferro & medicamentis
mederi fuerunt soliti, ipsa quoque hæc pars est
antiquissima. Veteres hinc medici pari studio
chirurgiam coluerunt, tanquam medicinæ par-
tem essentialem ac summe necessariam: adeo ut
priscis temporibus vix inveneris celebres medicos,

quin tuerint præclari chirurgi. Sed transiit pedetentim ad servos medicorum ars præstantissima, & ad nudam empyriam relegata fuit ; nisi forsan hinc inde emicuerint veri chirurgi admodum rari, Fabricius ab Aquapendente, Hildanus, Paræus, Scultetus &c. Nostris autem temporibus sepulta ferme chirurgia resuscitari visa fuit ; postquam Galli, & hos quidam Germanorum sequuti in ea excolenda insigniter defudarunt. Verum enim vero quemadmodum chirurgia duplex est, nimirum quæ vel ferro ac instrumentis curat, vel quæ medicamentis medetur : ita hodie manualis illa ac instrumentalis præ medica palmam præripere videtur. Si summos nostrorum temporum chirurgos, ac stellas in coelo chirurgico primæ magnitudinis describerem : dicerem, quod sint galants hommes, qui estrani audacia omnia urere, secare, scindere, amputare, ac gallicam linguam strepere didicerunt. Hinc prohi dolor ! eo devenit res, ut qui ulcere quodam antiquo & sordido affectus, absque membri ulcerosi amputatione sanari cupit, fidera illa chirurgica minime adire debeat. Et gratulor Tibi, mi Lazare, quod nostris haud vixeris temporibus : cum enim totus fuisti ulcerosus, totum tibi forsitan corpus fuisset

fuiſſet amputatum. Abſit vero quam longiſſime, ut debitas chirurgiæ manuali detrahamus laudes; cui in certis caſibus ſuperſedere omnino non poſſumus. Sed optandum eſſet, ut melius excolendæ chirurgiæ medicæ ſtuderemus ! Si ulcera duntaxat diſpiciamus, horum quidem frequentiora in libris chirurgorum inveniemus; rariora autem & abſtruſiora vel confuſe deſcripta, vel alto prætermiſſa ſilentio offendimus. Eadem ſors preſit ea ulcera, quæ ſub nomine morbi Lazari perſcrutari bono cum Deo conſtituimus: faxit Deus, ut cedat feliciter.

§. I.

Quem Lazari morbum vocant, explicaturi, operæ eſſe pretium putamus, ut ipſius nominis rationem reddamus. Ipſa igitur origo divo Lazaro natales ſuos debere videtur: cujus ſacræ litteræ in Evangelio Lucæ cap. XVI. v. 20. mentionem injiciunt, tanquam pauperis & mendici, toto corpore ulcerofi, & ad fores divitis epulonis procumbentis. Neque vero ad nos pertinet, penitus inveſtigare, an hæc hiſtoria verum ſiſtat factum, uti veriſimile videtur B. Libero Baroni de CANSTEIN *in harm. Evangel.* aut num ſervator ſub Lazari perſona Johannem Baptiſtam, ſub divitis heluonius larva autem regem Herodem propoſuerit? anne potius parabolis ſit accenſenda? quippe quæ criticorum ſacræ ſcripturæ interpretum relinquimus indu-

strix. Id duntaxat instituti nostri ratio exigit, ut quantum irrationali conjectura licebit, perscrutemur, qualis morbus Lazari a veteribus medicis fuerit dictus, qualis nobis appelletur, an hodie adhuc detur ac quæ illius sit indoles ac curatio.

§. II.

Primum itaque haud ignorari oportet, omnium absurdissimam, nulloque prorsus argumento stabilem eorum esse sententiam, qui forsitan putarent, Lazarum laborasse lue venerea. Ut enim taceam, turpe ac infame hoc morbi genus cum hujus probi viri, quem post mortem protinus æterno gaudio donatum fuisse legimus, integritate plane pugnare; cui quæso in historia medica paululum versato incognitum erit, Neapolitanum hocce malum anno demum post Christum natum 1494. per milites, quos Christophorus Columbus ex America secum reduxerat, non tanto auro, quanto hoc morbo onustos, exercitui Romano Neapolim obsidione cingenti primum communicatum, & vi contagii, quod fovet, subtilissimi ad alias Europæ gentes delatum fuisse. *Conf. FALLOPIVS tr. de morbo gallico pag. 685. & ALEXANDER TRAIANVS PETRONIVS tr. de lue venerea pag. 1. seqq.* Sed visne forsitan, hanc gallicam luem cum Lindano aliisque jam veteribus & ipsi Hippocrati fuisse cognitam asserere: ac juxta IOHANNEM LANGIVM in *epist. medic. part. 1. ep. XLII. pag. 155.* ex acris constitutione dicto anno in Italia denuo recrudivisse? aut visne cum lepra veterum eandem pronunciare? Fateor multa esse utriusque morbi signa apprimè inter se convenientia: at vero non minus permulta sunt; quæ longissime ab invicem distant, & evidentem

fatis

fatis evincunt differentiam. Deinceps vero nulla prorsus mentio fit luis veneræ inter Iudæos grassantis, qui turpissima lepra satis mulctati fuerunt. Vnde ergo concludi posset, Lazarum illa fuisse conflictatum? Absit de hoc misero talia prædicare, qui tantum abest, ut vel cum scortis impuris rem habuisse, vel hominum hac lue infectorum consortio usum fuisse præsumatur, ut potius meliori dignus omnino sit iudicio.

§. III.

Fuitne ergo lepra affectus Lazarus? quemadmodum fere innuere videtur LAVRENTIVS *in exegeſi ad Evangelium Lucæ loc. cit.* & hinc leproſos olim Lazarum patronum invocasse refert CORNELIVS a LAPIDE *in Commentario ad citatum Lucæ locum.* Subſiſtamus hic pàullulum, & perſcrutemur lepræ varia genera, Inſignis committi ſolet a recentioribus præſertim medicis confuſio in explicanda lepra & elephantiaſi: quorum morborum clariorem apud veteres duntaxat reperimus ideam. Lepra veteribus dicta fuit vel Arabum vel Græcorum: illa dicitur elephantiaſis Græcorum, partim ob morbi magnitudinem, quam præ reliquis habet, quamque etiam Elephas inter cetera obtinere fertur animalia, Sunt ergo lepra Arabum, & elephantiaſis græcorum ſynonyma, a lepra Græcorum bene diſtinguenda. Datur vero etiam elephantiaſis Arabum, quæ eſt tumor ſcirrhoſus, varicoſus, diuturnus pedum atque crurum: de qua conferatur FVCHSIVS *in paradox. Lib. II. cap. 16.* FORESTVS *obſ. med. Lib. 29. obſ. 26.* AMATVS LV-SITANVS *Cent. 2. curat. 64.* WEDELIVS *Pathol. Med. Sect. III. Cap. IV. p. 512. &c.* Hæc porro elephantiaſis Arabum diſtinguenda eſt ab Alboti Avicennæ; quem

Lib.

Lib. IV. fenestr. VII. tr. III. describit; & Græci juxta *AE-TIVM Lib. IV. Cap. 62.* therminthum vocarunt, quoniam in cruribus suboriebantur crustulæ granis therebinthinæ haud absimiles: *FALLOPIVS oper. Tom. I. p. 685,* appellat malum mortuum recentiorum.

§. IV.

Elephantiasis autem Græcorum seu lepra Arabum fuit morbus totius corporis fœdissimus ac insanabilis ferme: quem descripserunt *ARETÆVS Lib. II. cap. 13.* *FALLOPIVS oper. Tom. II. pag. 268.* *LOMMIVS obs. medic. p. 51.* *FORESTVS obs. chirurg. Lib. IV. obs. 7. &c.* Dividunt eam in incipientem, ubi interna duntaxat viscera vitio laborant, cute immuni; & confirmatam, ubi præter interna totus corporis habitus tœde fuit deturpatus. Incipientis, utut intricatioris signa auctores citati tradunt sequentia: Torpor est omnium actionum atque functionum, respiratio difficilis, motus voluntarius tardus & segnis; alvus pigra; lotium subjugale ac semper turbidum, absque tamen feбри, vel vitio renum vel vesicæ: fœtida spiratio; quemadmodum etiam totius corporis odor & ipse sudor est fœtidissimus; inexplibilis urget ad venerem cupiditas seu tentigo; rauci sunt & per nares loquuntur; ceterum mores habent melancholicorum similes, somnia gravia, incubum perpetuum. Vbi vero hæc omnia transeunt in cutim simul, eamque turpissime defœdant, tunc cognitu faciliior morbus vocatur confirmatus. Horroris plenum & aspectu terribile morbi genus; cujus hæc sunt signa diagnostica: Facies potissimum depravatur; namque malæ tument inæqualiter, oculi præter morem rotundi, ac atro rubore conspicui altius reconduntur: frons reddi-

redditur amplior, rugosa, tuberculis obfessa; palpebræ cadunt; mentum intumescit tumoribus duris, scirrhis, canerosis; labra crassa, nasus sinus, aures acuminatæ, tota facies rimosa, ac colore morpheato induta. Adfligit præterea continua sternutatio, lingua, & nares internæ obsidentur grandinibus; unde nares constringuntur, ægri per os spirant: cadunt non solum capilli, verum etiam totius corporis crines, & evulsi in radice carnem secum trahunt. Oriuntur varicosæ inflationes, tubercula, grandines, verrucæ in toto corpore, maxime facie, pedibus, digitis: hæc tubercula desinunt in rimosas dehiscentias, ulcera fœtida, ac denique squamas & furfures nigros: muscoli consumuntur in toto corpore; cutis ~~diversis~~ ^{diversis} afficitur; ipsi ægri fiunt timidi, fugiunt hominum confortia, hosque habent odio. Denique integræ partes exeduntur ac consumuntur; hinc curiosi, ac fere risu, nisi hunc hominum calamitas prohiberet, digni sunt casus bini, quorum primum recenset GREGORIUS HORSTIUS *obs. med. Sect. IV. pag. 388.* ubi quidam elephantiasi affectus, mane surrexurus integrum pedem corruptum reliquit in lecto: alterum allegat SCHOPPIUS *ir. de lepra*, quod quidam elephantiacus nares emuncturus, has cum pituita simul in terram projecerit. Sed fides sit penes auctores.

§. V.

Hanc græcorum elephantiasin, Arabum lepram vocarunt quoque veteres Satyriasin, partim obvultum Satyris similem, partim tentiginem inexplibilem; Leoniasin ob faciem rugosam, leonibus similem, atque morbum Herculeum, quod sit magnus & inexpugnabilis.

B

Causa

Causa est inquinamentum ac miasma quoddam specificum; quod humores vitales partim inspissat, ut hinc mores melancholicorum pateant; partim inquinat & penitus corrumpit: quæ corruptio non solum succos lymphatico serosos, verum etiam ipsum purpureum cruorem depravat, ac denique solidas quoque partes relaxat, depascit atque consumit: unde etiam ratio peti potest omnium symptomatum, ac quod morbus sit insanabilis. Causæ remotæ allegantur vel hæreditaria labes, qua parentes eo morbo affecti hunc ad liberos propagant; vel contagium per concubitum ac conversationem communicatum, vel denique proprium vitium, quod in victu sordido, aëreque humido consistit. Quando mecum perpendo hodierni veri scorbuti symptomata, vix mihi temperare possum, quin iis cum afflictionibus elephantiacorum collatis, scorbutum leviorē elephantiaeos esse speciem asseram; & inde miram morborum pro diversa regionum ac aëris constitutione mutationem considerem. Sed transeat hæc conjectura, digna, quæ penitus investigetur.

§. VI.

Hicce sævissimus morbus primum in Ægypto, spectatim Alexandria admodum fuit familiaris ac fere endemius, ob Ægyptiorum victum sordidum, ac impura subterranea habitacula; quemadmodum attestantur **PLINIVS** *hist. nat. L. XXVI. cap. I.* **GALENVS** *Lib. II. de arte curandi cap. 10.* **PROSPER ALPINVS** *Lib. I. de medic. ægypt. cap. 14.* Hinc **LVCRETIVS** *Lib. VI. de natura*. Est elephas, inquit, morbus, qui Nili flumina propter gignitur, Ægypto in media, nec præterea usquam. Fuit ergo morbus ille temporibus **CORNELII**

CEL.

CELSI plane incognitus in Italia; quemadmodum ille *Lib. III. cap. 25.* attestatur. Postquam autem temporibus Pompeji Magni, Julii Cæsaris, ac Medici Asclepiadis Romanus exercitus Ægyptum petierat; ille reduxit secum contagiosum hunc morbum in Italiam, restantibus PLINIO *loc. cit.* PLVTARCHO *sympos. 8. probl. 9.* Abhinc demum latius vagabatur hoc malum per Europam, & maxime frequens fuit in Belgio, Gallia &c. adfirmantibus AMATO LVSITANO *Cent. 2. curat. 64.* & VALERIOLA *Lib. VI. enarrat. 5.* Quum autem lues venerea invaderet Europæas regiones; leprosus hic affectus fere penitus disparuit, saltem inter rarissimos refertur.

§. VII.

Verum enim vero longe alia fuit indoles lepræ Græcorum; quæ magis cutis vitium denotat veteribus, non totum corpus occupat, nec tam fœdam universæ faciei deturpationem involvit, quanta elephantiasi propria est. Elegantissimus FERNELIVS *Cap. de impetigine* exhibet hujus lepræ ideam sub generali nomine impetiginis: cujus quatuor sistit species, nimirum primum scabiem siccam, quam veteres vocare solent pruritum; deinde lichenem; tum psoam, & denique lepram Græcorum. *Conf. FORESTVS obs. chir. Lib. I. obs. X. GREGORIUS HORSTIVS obs. med. Sect. IV. p. 390.* fufius explicat psoam & lepram hisce verbis: *Psoam judicamus, si scabies sicca, fœda cutim afficit, eam pustulis majoribus exasperat, duriores, tumidioreque reddit, exedit, findit, ac in ea furfures producit. Lepram Græcorum colligimus, si malum in pejus progreditur, ut cum maximo aruitu & corporis atrophia caro sub cute simul exedatur, cu-*

sis non solum in furfures, sed etiam squamas resolvatur, nunc crassiores, nunc tenuiores, maxime circa pilosas capitis & faciei partes. Gradu enim ferme differunt hi morbi, adeo ut psora male curata in lepram Græcorum; hæc in elephantiasin abeat. Psoræ seu scabiei summe malignæ casus hodiernum adhuc dantur, licet rariores; qualem etiam recenset Excellentissimus HOFFMANNVS *in med. consult. Tom. IX. cas. V.* Num autem vera adhuc apud nos detur lepra Græcorum, fere ambigo; cum omnes quotquot de ea legi, observationes, mihi adeo videantur esse comparatæ, ut vel ad psoram vel Arabum lepram majori referri mereantur jure.

§. VIII.

Lepra autem Judæorum peculiaris plane fuit indolis, quæ magis ad Græcorum, quam Arabum lepram accedit. HORSTIVS *loco supra citat.* putat eam convenire cum vitilagine alba, & lichenibus: sed meo quidem arbitrio, vera illius indoles ac natura, quippe quæ etiam ædificia fuerunt imbuta, nobis manebit incognita & admiranda. Describitur illa in sacris bibliis Leviticor. cap, XIII. unde tantummodo sequentia notabimus momenta: 1) quod lepra Judæorum constiterit in maculis albis, nive candidioribus, hinc inde in corpore sparsim obviis; quæ si locum capillatum obsederunt, pilos dealbarunt simul, 2) hæ maculæ exstiterint cute profundiores. 3) ulterius repserint; 4) juxta dies criticos a sacerdote fuerint judicatæ: 5) nec totum corpus occupaverint; tunc enim leprosi pro puris declarabantur, & 6) denique nullibi in sacris paginis reperimus, scæminam hoc diro morbo fuisse sollicitatam, nisi sororem Moïsis Mirjam Deuter. XII. Hinc porro si
qua-

quæstio occurrat, num nostris adhuc temporibus detur lepra Judaica? hanc recte negasse videtur OSIANDER in *Comment. ad Pentateuch. Part. III. pag. 112.*

§. IX.

Quod si ergo jam quæstio incidit, num forsitan lepra quadam laboraverit Lazarus? hanc de lepra Græcorum vel Judaica plane negamus. Namque juxta divinam legem leprosi Judæorum a consortio sanorum hominum penitus removeri debuerunt, ne inquinarent alios. At enim vero, cum licuit Lazaro ante divitis epulonis fores procumbere: vero utique est simillimum, ipsum hac lepra minime fuisse conflictatum. Quod autem attinet lepram Arabum, seu Græcorum elephantiasin: haud ignorari oportet, omnes veterum medicorum unanimi consensu, eum morbum divi Lazari appellare suevisse; quos inter auctoritatis causa allegamus FORESTVM *obs. chirurg. Lib. IV. pag. 106.* FALLOPIVM *Oper. med. Tom. I. pag. 268.* GREGORIVM HORSTIVM *obs. medicin. Sect. IV. pag. 388.* quid? quod Fallopius expressis enunciet verbis: *morbum hunc patiebatur S. Lazarus, mendicus ex Evangelio.* Hinc quoque iis temporibus, quibus primum Italiam obsidere cœpit hæc affectio, præter nosocomia ædificata fuerunt leptosoria, quibus fruebantur soli leprosi: qualis cum deinceps putatus fuit Lazarus, hæc nosocomia leprosorum dicta sunt Lazaretta, teste CORNELIO a LAPIDE in *Comment. ad cap. XVI. Lucæ.* Quam ob causam excusationem me impetraturum confido, si elephantiasin hanc, quam omnes hucusque vocarunt morbum Lazari, superius paullo fusius descripserim.

§. X.

Verum enim vero pace tot clarissimorum viro-
rum negaverim, Lazarum laborasse elephantiasi Græco-
rum. Namque si ea laboravit, laboravit confirmata,
quoniam dicitur ulcerosus. Si ergo laboravit confir-
mata, & odorem spiravit foetidissimum, & faciem præ
se tulit fœdam, tuberosam, aspectu horrendam: siqui-
dem teste HORSTIO *in obs. med. Sect. IV. pag. 388.* faciei
deturpatione illius morbi elephantiaci propria ac diagno-
stica exhibuit signa. Quis ergo crederet, fore ut dives
helluo permiserit, tam turpe fœdumque spectaculum
ad ejus fores procumbere? Præterea autem, cum con-
tagiosum fuit hoc morbi genus: Judæos procul dubio
hoc morbo affectos ab omni hominum consortio fuis-
se separatuos, vero est simillimum. Et denique si per
metaphoram a similitudine miseræ, quam leprosi cum
Lazaro communem habere viderentur, desumptam fu-
isse denominationem contendas: quid, quæso, opus
est nomine metaphorico, ubi jam proprium adest? &
quare tribuimus alicui morbo denominationem meta-
phoricam, quæ alii magis proprie convenire inferius
ostendetur?

§. XI.

Non alienum erit hoc loco allegare quædam ex
WEDELII *exercit. medico-philog. Cent. II. Dec. II. exerc. II.*
ubi agit de Lazaro ante portam. Postquam auctor in
criticis ac philologicis versatissimus, de Lazaro, ejus-
que conditione exegesis veluti quandam præmisit; &
ad explicandam ipsam, qua sollicitatus fuit Lazarus, æ-
gritudinem devenit: concedit equidem Lazarum ulce-
ribus sordidis ac scorbuticis affectum, universali hu-
mo-

morum laborasse dyscrasia. Fovet autem duas opiniones, quibus, pace tanti viri, calculum addere valde dubito. Putat etenim primum, ulcera præsertim occupasse pedes: cur? quoniam reliquum corpus stola ordinaria, seu saltem lacero centone indutum fuisse credit. Sed insufficiens hæc concludendi ratio: pedes fuerunt nudi, ergo maxime ulcerosi! Deinde vero pag. 13, putat, quod cum sæpius contingat, ulcera externa complicari morbis internis, vero sit simile, Lazarum simul laborasse ileo hæmatite Hippocratis. At enim vero, quæ, qualis, quanta conclusio! Ego certe hisce conjecturis, cum ne minimam quidem fundamenti speciem habeant, subscribere neutiquam possum. Majorem probabilitatis gradum præ se fert sententia, quam fovet SALVIANVS MASSILIENSIS lib. 3. contra avaritiam pag. 115. *Lazarum, enim inquit, dives contempserat, qui in pure ac sania computruerat; ejus fœtorem ac squallorem longe refugerat, qui membrorum suorum ulceribus canes paverat, quem SCATENTES VERMIVM GLOBI ETIAM INTRA RECESSVS PERESI CORPORIS EXARARANT &c.* Nimirum, cum hoc ulcerum genus præ reliquis ad recipiendam verminosam colluviem esse opportunum, ex infra dicendis patebit: facillimum fuit, ut ea ulcera in Lazaro etiam vermibus scatuerint. Sed nec hæc conjectura nobis utilitatem spondet.

§. XII.

Missis ergo, quæ nullo gaudent fundamento; cum recensiti morbi ita sunt comparati, ut non adpareat, qua ratione nomen morbi Lazari istis competat, nisi velimus per metaphoram loqui: dispiciendum jam erit, numne detur morbus quidam ulcerosus, qui eo nomine
magis

magis sit dignus? sic enim argumentamur: si datur morbus ulcerosus, qui cum Lazari vitæ genere ac conditione omnium maxime quadrat; hodiernis adhuc revera existit temporibus; & nullum nomen proprium adhuc nactus fuit: ille præ omnibus aliis morbus Lazari adpellari meretur. At vero dari talem morbum postea ostendemus; ergo eum dignum reputamus, qui dicatur morbus Lazari. Nihilo tamen minus, licet vero videatur simillimum, Lazarum revera eo morbo sollicitatum fuisse, haud demonstrative audemus hoc adfirmare. Nobis enim perinde est: id duntaxat jam instituti ratio exigit, ut ostendamus, quem sub morbo Lazari intelligamus morbum; illius historiam ac causalem explicationem tradamus; eundem nondum revera habere nomen proprium monstremus, ac denique medendi rationem subnectamus.

§. XIII.

Intelligimus ergo per morbum Lazari affectum quendam ulcerosum, cujus ulcera sunt sordida, occupant musculosas potissimum corporis partes, abdomen, dorsum, brachia, femora; foveant carnem subtus jam putridam; saniem plorant turpem foetidam; coalescunt facile; sed mox in altero loco recrudescunt, hanc scenam per multos longosque annos, maxime in personis infimæ sortis, plebejis, mendicis foedo ludunt spectaculo, & ægre perfectam admittunt sanationem. Vocatur vulgo *der Wurm, ein Wurm-Schaden*: quasi vero hic affectus ad recipiendam atque fovendam vermium colluviam ob suam sorditiem præ reliquis existat opportunus. Est quoque ad generandos vermes revera maxime promptus; quos si actu fovet, dicitur *ulcus vermino-*

minosum, merito & proprie a nostro morbo distinguendum. Jam vero, priusquam ad hujus historicam progrediamur explicationem: præmittemus quasdam de eo morbo observationes, ab amico quodam nobiscum communicatas.

§. XIV.

Fœmina XXX. annorum, quæ præmaturo mariti, pastoris suum, obitu ad eam redacta erat miseriam, ut per decemjam annos ostiatim victum quærere debuerit; inciderat sub hac vagabunda vita in militis cujusdam exauctorati, erroneis pariter mendici societatem, ab eoque sub spe matrimonii ad intimiorem familiaritatem & coitum frequentiorem adducebatur. Hujus autem vitæ tandem pertæsa, ulterius cum hoc nebulone rem habere recusavit: at ab illo verberibus male habita & pedibus pessum data fuit. Quibus cum pectus miseræ percussisset sæpius; illa non solum sanguinem spueræ cœpit; verum etiam tuberculo inter mammas suborto corripiebatur; quod emplastro therebinthinato inunctum latius serpere cœpit, & adplicato demum emplastro mellito variis locis exulceratum est. Abhinc jam quatuor agebantur anni, cum insuper mensium suppressionem, fluoris albi continuum profluvium, spirandi difficultatem, capitisque ac artuum atroces retinuisset dolores. Pectoris ulceribus imposito fimo suillo consolidatis, nova succedebant in femoribus, dorso, poplite, aliisque locis, adeo ut toto corpore Lazari instar ulcerosa existerit. Erumpunt nimirum in quodam loco tubercula livida, quæ demum rupta carnem subtus ostendunt ferme putridam, ichorem plorant fœtidissimum,

mum, colorem nigrum exhibent; & uno loco coälita, aliis in partibus recrudescent.

§. XV.

Alteri mulieri XXX. & quod excurrit annorum, infimæ fortis, amore olim surreptitio usæ, hinc spurium fœtum enixæ ac fluori albo obnoxia, novem abhinc annis quædam in sinistro pede efflorescebant prurientes pustulæ, quæ ex incongrua curatione latius serpentes, fonticulo demum brachio inflicto sunt sanatæ. Quatuor elapsis annis doloribus dextri humeri vagis sollicitata, illos venæsectione & scarificatione ejusdem humeri fugavit: quibus fugatis adparuerunt in eodem brachio tumores, qui exulcerati putidum mox fuderunt ichorem cum fœtore & profundius perserunt. At his a chirurgo quodam consolidatis nova in poplite recrudescebant tubercula, quæ statim in ulcera profunda, fœtida, dolore ac ardore stipata dehisciebant. His iterum per imposita folia hyoscyami coälitis, nova in aliis locis efflorescebant, & hanc per plures annos ludebant scenam. Alia fœmina rustica post suppressos ante quatuor annos menses, de ventriculi dolore, artuumque tormentis conquesta, consuluit empyricum circumforaneum; qui propinatis remediis effecit, ut illa ulcera abdominis, femoris, aliarumque partium post prævia tubercula inciderit, iisdem, uti antea dictum, symptomatibus. Alius vir mercenarius iisdem ulceribus vagis, sordidis, fœtidis, post toleratam febrem acutam infestabatur: in quo notatu erat dignum, quod ubi fanescere videbantur hæc ulcera, ille in artuum immanes inciderit dolores, & demum in ipsam
iterum

iterum acutam febrem ; quæ recrudescentibus ulceribus solvebatur.

§. XVI.

His ergo eum in finem allegatis , ut appareat dari revera hunc morbum ulcerosum , de quo apud plerosque scriptores medicos ac chirurgos altum est silentium : illius historiam paucis complectemur. Infensus nimirum potissimum est hominibus plebejis , sordidis , mendicis , impuro vitæ genere utentibus , ac in victu pariter ac amictu immunditiei indulgentibus , partim ex lubricidine , partim necessitate coactis : neque ideo forsan a Doctissimo Ramazzini inter morbos artificum relatus , cum mendici non sint artifices. Pertinet potius ad magnos morbos , quorum parva sunt initia. Namque occupant primum pustulæ , tumores , tubercula parva partes maxime musculosas ; livida sunt , majora evadunt , pruriunt , ardent : mox dehiscunt in rimas ac aperta ulcera : quæ carnem subtus jacentem exhibent corruptam , nigram , ac fere putredinosam , sensu tamen non penitus ablato : ichorem plorant foetidissimum ; magis serpunt in profundum ad substratos musculos , eosque consumunt , exedunt , depascunt : hinc coälita cicatricem formant , ac foveam reliqua cute magis depressam , & profundiorē . Consolidantur in uno loco facile ; sed in altero plus minus remoto nova succrescunt iisdem symptomatibus , pruritu atque dolore stipata ; & quod maxime miror , hancce scenam per aliquot annos ludunt , vita superstitē . Ægerrime enim perfectam admittunt curationem ; sæpius complicantur vermibus , qui tanta caterva ac multitudine ea ulcera occupant , ut nullis ferme remediis deleri queant : subest frequentius

venerea inquinatio, ac in sequiori sexu fluor albus: ut taceam reliqua symptomata magis accidentalialia. Neque tamen more ulceribus venereis consueto pudenda, fauces & faciem obsident, sed magis brachia, humeros, dorsum, lumbos, abdomen, pectus, femora, suras &c. occupant. Quando ita per satis longos sævierunt annos; tandem lenta, hæctica, depascens supervenit febricula, miserosque a suis vindicat calamitatibus.

§. XVII.

Qua igitur notata morbi historia, illius causalem explicationem prosequemur. Ulcus ut a vulnere, quod est læsio continui recens in partibus mollioribus, a causa externa secante, rumpente, pungente aliaque inducta, rite distinguatur, est læsio antiqua, a causa magis interna excitata, cum humorum quorundam corruptione ac ichoris serosi plus minus putidi effluxu stipata. Læsiones externæ in nostro morbo obviæ possident eas adfectiones; Ergo sunt ulcera. Omne ulcus involvit corruptionem alicujus humoris: qui cum varii sint, varietate corrumpantur, varia constituunt ulcerationum genera. Corruptantur autem humores vel soli citra peregrinum fermentum; vel ab alio miasmate, sæpius contagioso. Hinc resultant ulcera vel simplicia, vel qualificata.

§. XVIII.

Quemadmodum humores nostri corporis differunt inter se: ita corruptio, prout hos vel illos occupavit, ulcerum simplicium producit varietatem. Quare haud ignorari oportet, quemcunque humorem peculiarem subire corruptionem: sanguineus nimirum cruor sphaecelofam & putredinosam, uti in sphaecelo; serosa colluvies

lucies ulcerosam, uti in plerisque ulceribus superficialibus cutim duntaxat corrodentibus: lymphaticus latex mucidam spissam, uti in tumoribus aliquatenus; solus enim raro corrumpitur; salivalis ros acriorem fermentescentem; chylosus ac lacteus succus ulcerosam acidam parunt corruptionem. Hæc ulcera proprie ac striete merentur nomen simplicium. Verum enim vero cum sæpius contingat, & in uno ulcere bini humores simul corrumpantur: facile adparet, simplicia ulcera late dicta omni fundamento dividi debere in talia striete nominata, qualia fuerunt recensita; & mixta sicce composita, a qualificatis separanda.

§. XIX.

Quamobrem ulterius sciendum, serum & lympham rarissime separatim corrumpi; sed plerumque complicatam esse horum succorum corruptionem. Verumtamen in quacunque ulceratione serosiores partes præ lymphaticis sunt corruptæ; ibi est ulcus indolis simpliciter falsæ: qualiaprehenduntur ulcuscula scabiosa, achores &c. His proprius est pruritus. Vbicunque autem lymphatica corruptio prævalet serosæ: enascuntur ulcera acriora, rodentia, callosa, serpiginosa, herpes &c. quibus propria est rosio; arrodunt autem solam tantummodo cutim, vel saltem summam carnem. Quandoque denique partes lymphatico serosæ ita corrumpuntur, ut sanguinis quasdam particulas in corruptionis societatem rapiant: suboritur ulceratio semi putrida, cui proprius ardor ac æstus.

§. XX.

Seorsim de sanguine notandum, quod ille cum reliquis humoribus corruptionem subiens, satis fontica

constituat ulcera putrida, mali moris sive cacœthea; quæ substratas carnes, musculos, nervos, tendines &c. depascunt, profundius exedunt, ichorem plorant putridum, fœtidissimum, nigredinem contrahunt. Observetur autem sequens differentia: Quando sanguinis tenerimæ, flavescentes magis particulæ modica quantitate cum majori feri vel lymphæ copia corruptionem subeunt; exsurgunt ulcera erysipelacea, ex erysipelate male tractato suborta, quæ sub nomine herpetis esthiomeni indigitasse videntur veteres. Quum autem sanguinis subrufa magis complicatur substantia; emergunt ulcera profundius serpentina, colliquantia ac vicinas exedentia partes, quæ vocantur phagædenica, ambulativa, manducativa &c. Horum pessimum videtur illud, quod veteres ulcus nomodes seu nome vocarunt. vid. FALLOPIUS *tr. de ulceribus pag. 14.* ubi præter allegata signa sensus adest privatio ac mortificatio, & quod gradu tantum, ac in eo differt ab ipso sphacelo, quod in illo sanguinis corruptio aliis humoribus paullulum veluti coercetur, ne tam præcipitem putredinem ac mortem inferat. Quod si denique sanguis cum chyloso aut lacteo serosoque humore, & quidem in partibus glandulosis corrumpitur: resultat ulcus cancrorum, carcinoma, cancer.

§. XXI.

Restant adhuc ulcera qualificata, quæ specificam ferme corruptelam ac peregrinum possident fermentum. Horum recensentur bina, nimirum scorbutica & venerea. In illis deprehenditur universalis humorum dyscrasia scorbutica, quæ in peculiari eorundem coagulo consistere videtur: ex qua dein sanguinis hac corruptela im-

buti,

buti, & cum sero acri in stasim abeuntis fit corruptio ulcerosa, odore foetido, colore nigricante, ichore tenui foetido, conspicua. Contra vero ulcera venerea nituntur magis obviscatione humorum seroso salivalium ac seminalium; spirant odorem magis nauseosum & situlentum, quam foetidum; & præ aliis partibus pudenda, faciem, fauces obsident. Neque vero negari potest, quin & hæc ulcera qualificata insuper composita reddi queant: sicuti venerea cum scorbuticis commode complicari queunt.

§. XXII.

Quæ itaque in nostro morbo occurrunt ulcera; ea profundius ad substratas partes serpunt, foetorem exhibent putredinosum, nigricantem carnem monstrant, ichoremque fundunt foetidum: ergo involvunt corruptionem humorum sanguineo serosorum, & sunt ulcera phagædenica. Deinceps in nostro morbo homines victu impuro, ac sordido vitæ genere utuntur: hinc sunt scorbutici adeoque eorum ulcera scorbutico phagædenica. Quum autem subjecta illa porro in sordida sua vita abutuntur venere, eaque utuntur impura, in tali vitæ genere frequentissima: sæpius fit, ut ulcera eorum sint complicatissima, nimirum phagædenica scorbutico venerea.

§. XXIII.

Neque vero jam opus esse putamus, ut pressius ac fusius recensendis causis nostri morbi occasionalibus insistamus: sponte enim patet, has inter efficacissimas esse, quæ recensita dyscrasia humores imbuere valent. Ea vero jam nobis occurrit objectio; qua cum superius diximus, morbum præsentem nullum adhuc nomen habere proprium; præcedente autem periodo ulcera vocavi-

mus

mus phagædenica scorbutica, nobismet ipsis contra dixisse videri possemus? Verum enim vero, quemadmodum insuperficialibus ulcusculis falsis seroso lymphaticis, ille affectus, in quo ea deprehenduntur, vocatur scabiosus, achores &c: quidni nobis liceret, morbum, in quo occurrunt ulcera scorbutica, phagædenica, venerea, Lazari affectum denominare; Eo magis, cum hæc ulcera in hoc morbo, ab iis, quæ aliis singula ac separata incidunt, longe discrepent; quia partes magis musculosas occupant, consolidata in aliis locis erumpunt, ac tam diu hanc scenam, vita superstitie ludere queunt.

§. XXIV.

Dum itaque subjecta morbi Lazari sint homines plebei, mendici, victu impuro, sordidis habitaculis gaudentes, hinc accedente levi amictu salutarem transpirationis successum præpedientes: facile patet, quod ex iis causis, sibimet acquirant dyscrasiam totius massæ sanguineæ scorbuticam. Qua cum succi reddantur acres, erudi, spissi ac specificè coagulati: illorum portio quædam sanguineo serosa facillime in partibus potissimum exterioribus, ubi sanguinis circuitus tardior est atque debilior, stagnationem & stasim subit. Stagnantes ergo ac accumulati in musculo quodam humores amplius occupant spatium; hinc fibras musculares ac cutim relaxant, distendunt, elevant, & in tuberculum attollunt. Quæ stasis cum sanguineo serosa sit; tubercula illa obferum acre pruritus, ob sanguinem ardorem referunt; & quia serum cruore tinctum cutim jam relaxatam ingreditur, livida adparent. Interim stagnans ea portio, adhuc intra musculos inclusa, abit in corruptionem putredinoso ulcerosam: hinc fibras musculi, cutimque ex-

dit,

dit, depascit, colliquat, hanc in rimas diffindit ac ipsa ulcera. Hæc aperta ob serum corruptum fundunt ichorem; ob intermixtum sanguinem foetidum, colorem nigricantem, carnem semi putridam ostendunt; & sic profundius serpunt, donec expurgata olluvie corrupta coalescant, & ob exesam carnis portionem, foveam reliqua cute profundiore relinquant.

§. XXV.

Consolidantur autem hæc ulcera facile; quoniam more ulceribus putredinosis consueto affluxu humorum inflammatorio sunt destituta, & hinc evacuata ulceris materia nihil est, quod coalitionem impediat. Quo vero minus sanguinea corruptio putredinem inducat sphacelosam; prohibet ei intermixta serosa portio, quæ illam coercet, ac putredinem lentiores veluti muriaticam constituit, vi suæ salsedinis, cujus interventu a velociore prohibetur fermentatione. Talia ergo sordida ac putrida ulcera vermium colluviem admittunt facillime, & eo magis, cum forsitan plebeji isti homines illis imponant folia brassicæ aliaque seminio verminoso scatentia. Consolidata autem in alio loco erumpunt: neque mirum: causa enim, quæ huic coälito jam ulcери natales dedit, jam adhuc præsto est; quæ cum homines per multos annos occupat, hanc ulcerosam quoque tragœdiam per multos annos ludit. Salutari autem consilio accedunt hæc ulcerationes, quibus inimica humanæ machinæ saburra eliminatur; hinc non miror, quod vir ille, cujus sub finem §. XV. mentionem fecimus, ulceribus suis penitus coalitis inciderit febrem acutam, illis vero iterum efflorescentibus, ab hac liberatus fuerit.

§. XXVI.

His ergo præmissis facile colligi potest, hæc ulcerâ satis diuturna, & ob pertinacem ac intimam humorum dyscrasiam, curatu esse difficillima; quæ curatio eo magis impeditur, cum homines plebeji tam accuratum victum observare haud possunt. Quod itaque ipsam attinet curationem; occurrunt bini potissimum scopi, nimirum ut primum massa sanguinea depuretur, ac a scorbutica iniquatione vindicetur; deinde ipsa ulcera abstergantur atque mundificentur. Depuratio humorum solidam promittit curationem: pro qua impetranda ante omnia eo studere convenit, ut robur ventriculi confortetur, ac digestiva vis restituatur: quo exinde chylus laudabilis, & ex hoc legitimus generetur sanguis. Deinde vero excretiones naturales, maxime quæ per alvum, cutim ac urinam fiunt, in legitimum ordinem atque successum reducantur: quo per eas jam generatæ sordes ac impuritates ex corpore proscribantur, Et denique talis vivendi ratio præscribenda, quæ bonos succos suppeditet.

§. XXVII.

Egregius est aphorismus: impura corpora, quo plus nutriveris, eo magis lædes. Hinc in feliciter extirpando Lazari morbo non efficaciorē putamus curationem, quam quæ per famem fit (*die Hunger-Cur*) Hæc ita instituat, ut ægri primum vescantur cibis minus nutrientibus, iisque parcissimis; ac inter illos carnibus assas magis quam coctis. Dein quavis maneportionem sulphuris antimonii fixati ad mentem *Excellentissimi* PRÆSIDIS præparati assumant ex decocto quodam antiscorbutico, quod ex radice sarsaparillæ, lapchi

pathi acuti, & doronici cum aqua paretur; ex his enim sudor fluet egregius, quo impuræ humorum partes simul ejiciuntur. Pro potu ordinario inserviat idem decoctum magis secundarium: v. g. Recipe radicis sarsaparillæ uncias quatuor, lapathi acuti unciam unam, radicis Doronici unciam dimidiam. M. infundantur per noctem cum mensuris sex aquæ simplicis: coquatur mane ad consumptionem tertiæ partis. d. pro decocto primario. Hujus autem residuo addantur aquæ mensuræ septem, coquantur pariter ad tertiæ partis remanentiam. D.S. *schwacher Tisch-Trank*.

§. XXVIII.

Vt sub hac curatione roboretur simul ventriculus; operæ erit pretium, sub epulis essentiam roborantem ac resolventem L vel LXX guttulis assumere; quæ ex succini albi pulverisati uncia una, cum tincturæ antimonii acris unciis sex infusa concinnari potest, eique essentia trifolii fibrini, aut marrubii albi permisceri. Proinde ut sordes mucidæ, & acres primarum viarum eliminentur; necesse est, singulo quatrinduo laxans quoddam lenius rhabarbârinum exhibere; præstat enim generatim in hisce morbis remediis pugnare magis liquidis, quam ficcioribus atque pulverulentis. Hac curatione per tres circiter vel quatuor hebdomades protracta, si vires sint integræ, per aliquot hebdomades alternis diebus stupham siccam sudatoriam sub debitis cautelis ingredi, haud alienum erit: qua scilicet decoctum saturatius lateribus candentibus infundatur, & vapor corpore excipiat, capite probe munito. Haud enim ignorari oportet, homines hisce ulceribus affectos balnea sicca egregie ferre; & non dubitamus, quin ex di-

et a curatione debite adhibita felix insequuturus sit eventus.

§. XXIX.

Quod externam horum ulcerum tractationem attinet: eo omnes nervos intendere oportet, ut illa mundificentur, ulcerosa putredo arceatur & abstergatur, ac si forsan verminosa præsto sit colluvies, ea eluatur. Huic ultimo scopo inservit egregie spiritus vini rectificatus. Inter mundificantia primum locum obtinent myrrhata, succinata, mellita &c. quæ simul putredinem mirifice arcent. Hisce vero, cum specifica sit corruptio, addi possunt succi herbarum antiscorbuticarum, veluti sunt cochlearia, beccapunga, fumararia, sedum vermiculare, acetosa &c. Convenit etiam in subjectis minus sensibilibioribus lixivium ex calce viva & sale ammoniaco paratum adplicare, quod potenter abstergit. Et denique egregiam exserit virtutem ferme specificam radix lapathi nigri palustris, a Muntingio nomine herbæ Britannicæ insignita, & vel in succo, vel linimento ulceribus inuncta.

§. XXX.

Quod si, ut sæpius fit, commixtum sit inquinamentum venereum: quæstio est, num salivatione uti liceat? Mihi quidem haud arridet; quoniam experientia constat, eam in affectibus scorbuticis majus inferre damnum, quam emolumentum. Et præterea spero, fore ut & hæc inquinatio commendata curatione expugnari possit. Magis arridet æthiops mineralis, ea ratione, quam *Excellentissimus D. Professor SCHVLZE in A. N. C. Vol. I. obs. 222.* exposuit, adhibendus: de cujus egregia in resolvendo humorum coagulo efficacia con-

con-

conferatur prælaudati *Viri dissert. de æthiope minerali anno 1725. Aldorffi habita.*

§. XXXI.

Et hæc sunt, quæ paucis de morbo Lazari proponenda duximus. Quicumque de illius vera existentia convictus esse cupit: haud adeat chirurgos summos, sed nosocomia. Nec deerunt quidam hinc inde dispersi Chirurgi civitatum; quos hæc ulcera sæpenumero discruciarunt; ex quorum numero nobis peritus hujus urbis Chirurgus STECHEISEN nonnullas enarravit hujus morbi observationes, cujus nomen se ignorasse fatetur, Si vero quidam fuerint, quibus hæc tractatio haud placuerit; non miror; *non enim omnibus, nec omnia mihi placuere; quinam ego omnibus?* Opto ceterum, ut hæc meæ meditationes, eum, quem intendi, adipiscantur

F I N E M.



NOBILISSIMO ATQVE DOCTISSIMO
DOMINO CANDIDATO

PRÆSES,

Communissimum est inter eruditos maxime
vero inter Medicos hodie, ut de fortuna
nimium adversa, deque seculo bonis arti-
bus inimico admodum tristes conqueran-
tur. Qua quidem de calamitate quotquot ego dolen-
tes unquam vidi, tot sua magis quam seculi culpa
infortunatos esse deprehendi. Et quidem, ut aliorum
taceam exempla sapientium, si Medicos ætate prove-
ctiores tam fama ac dignitatibus quam opibus pau-
peres cognovi; his vel solidioris Medicinæ ignoran-
tiam, vel morum turpitudinem animique impruden-
tiam maxime obfuisse sum expertus. Quare nec ha-
beo, quod salutaris scientiæ cultoribus ab initio ma-
gis spondeam, ac diligentius commendem, quam ut pri-

primo in addiscendis rationalis theoriæ fundamentis, iisque cum recta ratione ad usum applicandis omnem navent operam, deinde & morum diligenti cultura eo contendant, ut cum cujusque sortis hominibus prudenter atque modeste vivere adforescant. Enim vero constanter observari, hæc duo momenta, nimirum accuratorem in cognoscendis & curandis morbis peritiam, & prudentem vivendi rationem sola fere sufficere, ad felicem reddendum Medicum: cum ista honores ac divitias, hæc vero fiduciam atque amorem ægrotorum, qui præcipuum fortune Medicorum fulcrum est, conciliet. At vero, ut pateat, cur istæ in medium a me prolatae sint meditationes, diffiteri non possum, CLARISSIME DOMINE CANDIDATE, me ex egregia TVA in rebus ad Medicum pertinentibus eruditione, pariter ac politissimis moribus multa capere TIBI gratulandi, ac bene de TVIS rebus sperandi argumenta. De eruditione quidem TVA, quam duobus solemnibus examinibus, coram totius ordinis Medici confessu, haud vulgarem esse comprobasti, hoc certus affirmare possum; quod felix morborum debellatio una cum fructibus atque præ-

miis

miis dignissimis TIBI nunquam sit defutura : Deinde cum singularem in TE modestiam una cum laudatissimo aliis inserviendi studio semper animadverterim, non dubito inde augurari, fore ut communi & superiorum & equalium pariter ac inferioris ordinis hominum favore atque amore diutissime sis fruiturus. Annuat Deus ter O. M. spei ac votis nostris integerremis ; atque in sui honorem proximique amplissimum emolumentum ut omnia TVA cedant conamina, jubeat clementissime. TV vero sospes ac salvus vive, atque a me omnia, quae TVVM ad commodum ullo modo pertinent, officia certus exspecta. Vale.

Dab. Hal. d. 12. Septembr.

MDCCXXXIII.

